

“Paak” Aur “Naapaak” Me Farq

Injeel : Muhaafiz 7:1-23

Kuch Yahudī log jo Fareesī^[a] kahalaate the aur kuch Musā^(a.s) ke qaanun ko paḍhaane waale ustaad Yerushalam me Īsā^(a.s) ke paas āe. ⁽¹⁾ Unhone dekhā ki Īsā^(a.s) ke kuch shaagirdoñ ne naapaak^[b] haathoñ se khaanā khā liyā thā. ⁽²⁾ Yahudī log aur unmeñ se Fareesī kḥaas tareeqe se binā haath dhoe khaanā naheen khaate the. Wo apne baap-daadā ke sikhaae hue taur-tareeqe par saḳḥṭī se amal karte the. ⁽³⁾ Yahudī log jab baazaar se waapas āte the to apne āpko binā paak kiye khaane ko haath naheen lagaate the. Wo log apne buzurgoñ kī aur bhī bahut sī rasmoñ ko nibhaate the. Unke paas cheezoñ ko paak karne ke liye kḥaas tareeqe the. Wo chaay kī pyaalī ko, ghar ko, bartanoñ ko, aur baiṭh kar khaanā khaane waalī jagah ko alag-alag tareeqe se paak karte the.) ⁽⁴⁾ Fareesiyon aur Musā^(a.s) ke qaanun ko paḍhaane waale ustaadoñ ne Īsā^(a.s) se kahā, “Āpke shaagird apne baap-daadā ke sikhaae hue tareeqe par amal kyuñ naheen karte haiñ? Āpke shaagirdoñ ne khaanā khaane se pahale apne haathoñ ko paak kyuñ naheen kiyā, jaisā ki hamaare qaanun me likhā huā hai. Unhone aisā kyuñ kiyā?”⁽⁵⁾

Īsā^(a.s) ne jawaab diyā, “Tum sab banaawṭī ho! Nabī Yashaayaah^(a.s) ne sadiyon pahale tumhaare baare me bilkul theek likhā thā. Yashaayaah^(a.s) ne likhā thā, ‘Ye log sirf lafzoñ se Allaah taa’alā kī izzat karte haiñ apne dil se naheen. Inke dil Allaah taa’alā kī mohabbat se kḥaalī haiñ. ⁽⁶⁾ Inkī ibaadat bekaar hai. Wo log jo bhī sikhaate haiñ wo Allaah taa’alā ke naheen balki insaan ke banaae hue usul haiñ. Wo logoñ ko insaan ke banaae hue tareeqe par amal karne kā hukm dete haiñ.’⁽⁷⁾ Tum Allaah taa’alā kā hukm bhul gae lekin tum kabhī insaanī usuloñ par amal karnā aur use sikhaanā naheen bhule.”⁽⁸⁾

Tab Īsā^(.S) ne unse ye bhī kahā, “Tumne baḍī chaalaakī se Allaah taa’alā ke hukm ko kinaare karne kā tareeqā nikaal liyā hai aur apne taur-tareeqe ko ām kar diyā hai!”⁽⁹⁾ Musā^(.S) ne bhī kahā thā, ‘Apne maañ-baap kī izzat karnā. ^[c] Aur ‘Jo koī apne maañ-baap ko burā kahe yā unse burā suluk kare to use mar jaanā chaahie.’⁽¹⁰⁾ Lekin tum log sikhaate ho koī apne maañ-baap se kah saktā hai, ‘Mere paas jo saarī cheezen haiñ, maiñ āpke liye istemaal naheen kar saktā, kyuñki maine waadā kiyā hai ki wo sab maiñ Allaah taa’alā ko duñgā.’⁽¹¹⁾ Isī tarah se, tum sabko sikhaate ho ki apne maañ-baap ke liye kuch bhī nā kare. ^[d]⁽¹²⁾ To tum logoñ ko sikhaate ho ki Allaah taa’alā ke kalaam ko maannā zarurī naheen balki taur-tareeqe aur reeti-riwaaj zyaadā zarurī haiñ. Tum log is tarah ke aur bhī kaam kar rahe ho.”⁽¹³⁾

Tab Īsā^(a.s) ne saare logoñ ko apne paas phir se bulaayā. Unhone kahā, “Merī baat suno! Har koī merī baat ko dhyaan se sune aur samjhe jo maiñ kahne jā rahā huñ. ⁽¹⁴⁾ Kisī cheez ko khaane se insaan gañdā naheen hotā balki us cheez se hotā hai jo wo kartā hai. ⁽¹⁵⁾ Jin logoñ ke paas kaan haiñ wo ise dhyaan se sunen aur samjhen!”⁽¹⁶⁾

Jab Īsā^(a.s) wahaan se waapas ghar ke añdar ā gae, to unke shaagirdoñ ne unkī kahī huī baatoñ kā matlab puchā. ⁽¹⁷⁾ Īsā^(a.s) ne jawaab diyā, “Kyā tum bhī naheen samajh pae? Tum accḥī tarah jaante ho ki insaan ko wo cheez bilkul najis naheen kartī jo baahar se añdar jaatī hai. ⁽¹⁸⁾ Khaanā insaan ke dil aur dimaag me naheen jaatā. Khaanā uske peṭ me jaatā hai aur phir uske jism me se ho kar guzartā hai.”⁽¹⁹⁾

Īsā^(.S) ne kahā, “Suno! Wo cheezen jo insaan ke añdar se baahar nikaltī haiñ, wo usko najis kartī haiñ. ⁽²⁰⁾ Insaan ke dil aur dimaag se jo bhī shaitaanī cheezen nikaltī haiñ: Gañde kḥyaal, naajaaez taalluqaat, chorī, qatl, zinā, ⁽²¹⁾ khudgārzi, laalach, laḍaaī-jhagḍā, jhuṭ bolnā, burā tareeqā, jalan, peṭh peecḥe buraaī karnā, gūgur karnā aur bewkufī karnā. ⁽²²⁾ Ye saarī cheezen insaan ke añdar se nikal kar ātī haiñ. Ye wo saarī cheezen haiñ jo usko gañdā kartī haiñ aur Allaah taa’alā ke saamne naapaak kar detī haiñ.”⁽²³⁾

[a] Ye wo log haiñ jo Musā^(a.s) ke die hue qaanun par saḳḥṭī se amal karte the.

[b] Unhone us tareeqe se haath naheen dhoe the jaise Fareesī dhote the.

[c] Allaah taa’alā ke die hue das qaanun me se ye paanḥwaañ hai. (Taurait : Hijrat 20:12)

[d] (Quraan Majeed : Banī Israaeel 17:23)